

楞嚴經會解

卷之五

大佛頂如來密因修證了義諸菩薩萬行首楞嚴經卷第五

唐 天竺沙門般刺密

帝譯

烏菴國沙門彌伽釋迦

譯語

菩薩戒弟子前正議大夫同中書門下平章事房融筆受

元師子林沙門惟則集註

阿難白佛言。世尊。如來雖說第二義門。今觀世間解結之人。若不知其所結之元。我信是人終不能解。世尊。我及會中有學聲聞。亦復如是。從無始際。與諸無明。俱滅俱生。雖得如是多聞善根。名爲出家。猶隔日

瘡。惟願大慈。哀愍淪溺。今日身心。云何是結。從何名解。亦令未來苦難衆生。得免輪迴。不落三有。作是語已。普及大衆五體投地。雨淚翹誠。佇佛如來。無上開示。

溫陵曰。前第二義文云。不見所結。云何知解。故此牒之而請也。孤山曰。同體無明。品數至多。又迷境不一。故曰諸生滅去來。常在妄中。故曰俱補註曰。世之瘡病。隔日而發。爲其病根未除。故爾。喻有學聲聞。通惑雖破。而別惑病根未除也。

爾時世尊。憐愍阿難。及諸會中。諸有學者。亦爲未來一切衆生。爲出世因。作將來眼。以闍浮檀紫金光手。摩阿難頂。卽時十方普佛世界。六種震動。微塵如來。住世界者。各有寶光。從其頂出。其光同時於彼世界。來祇陀林。灌如來頂。是諸大衆。得未曾有。於是阿難。及諸大衆。俱聞十方微塵如來。異口同音。告阿難言。善哉阿難。汝欲識知俱生無明。使汝輪轉生死結根。惟汝六根。更無他物。汝復欲知無上菩提。令汝速證安樂解脫寂靜妙常。亦汝六根。更非他物。

溫陵曰。先摩其頂者。表無上開示也。六震者。動起踊吼震擊。表破六根妄結也。諸佛頂光灌釋迦頂者。示同發明無上頂法。異口同告者。示諸佛脫生死。證菩提。皆由斯要也。俱生。卽根本無明也。生死。妙常。同因六根者。知見立知。故輪生死。知見無見。卽證妙常。如下所明。

阿難雖聞如是法音。心猶未明。稽首白佛。云何令我生死輪迴。安樂妙常。同是六根。更非他物。佛告阿難。根塵同源。縛脫無二。識性虛妄。猶如空華。

吳興曰。根塵識三。攝十八界。本如來藏妙真如性。故曰同源。凡夫迷真故縛。聖人悟真故脫。迷悟雖殊。始終理一。故曰無二。同源。必兼識性。虛妄。必具根塵。文綺互也。

阿難。由塵發知。因根有相。相見無性。同於交蘆。

吳興曰。塵相同指六境。知見畧示二根。根境對論。攝十二處。斯皆兩法相涉。內無實性。故喻若交蘆。有以根境識三釋此喻者。非也。而不知經語巧妙。從寬至狹。上攝界義故三。此攝處義故二。下文又

畧其境。單言其根。故言知見立知等。是故汝今知見立知。卽無明本。知見無見。斯卽涅槃。無漏真淨。云何是中更容他物。

孤山曰。上言立知而畧見。下言無見而畧知。經文互影也。執知見實有名立知見。此卽妄心。是生死輪迴之本。故云卽無明本。達知見無性。名無知見。此卽真心安樂妙常。故云斯卽涅槃。無漏真淨。是則惟一真心。更無別法。故曰云何是中更容他物。又解。知見立知。是迷真知見。立緣塵等妄知見。故

卽無明。知見無見。是達真知見。無緣塵等妄知見。故卽涅槃。故前文云入佛知見也。佛知見外。更無別法。故不容他物。前釋約常心卽寂。一切皆泯。後釋約常心卽照。有真知見。故茲兩釋。並符佛旨。補註曰。云何是中更容他物者。由上諸佛告阿難言。輪生死。證妙常。惟汝六根。更非他物。阿難於此有疑。舉以問佛。佛乃兼引根塵識三。映帶辯釋。而復結以知見立知等語。知見二字。通攝六根。言爲無明。爲涅槃。無非六根而已。豈更容他物哉。此蓋釋

阿難之疑。而證諸佛之言也。又阿難前云。若不知其所結之元。我信是人終不能解。又云。今日身心云何是結。從何名解。故如來答以知見立知。卽是結也。卽是所結之元也。知見無見。卽名解也。爾時世尊。欲重宣此義。而說偈言。真性有爲空。緣生故如幻。無爲無起滅。不實如空華。

吳興曰。真性卽根塵之源也。有爲卽縛脫之相也。若真性在迷。能生九界根塵之相。名之爲縛。若真性出纏。能起十界根塵之用。號之爲脫。此縛與脫。

皆卽真而俗。故曰有爲。亦卽俗而真。故曰空也。緣生故如幻。釋成有空義也。有爲之法。皆從緣生。凡夫以惑業爲緣。聖人以機感爲緣。二緣所生。俱是假名。故曰如幻。此頌根塵同源。縛脫無二也。無爲下。頌識性虛妄。猶如空華。上言如幻。助成空義耳。今云空華。正顯虛妄也。且識性是有爲起滅之法。真性反此。故曰無爲無起滅。旣云虛妄。卽是不實。故喻如空華。舊以前二句破有爲。後二句破無爲。言出掌珎論。

言妄顯諸真。妄真同二妄。猶非真非真。云何見所見。中間無實性。是故若交蘆。

吳興曰。前長行但破於妄。今復恐捨妄取真。故重遣之。孤山曰。諸之也。語助耳。言根塵虛妄。則顯涅槃真實。對妄說真。待對不絕。真亦成妄。故云二妄。龍樹云。若法爲待成。是法還成待。猶非能遣也。真非真。所遣也。非真卽妄。見卽是根。所見卽境。對妄說真。猶皆遣蕩。云何更有妄中根境乎。中間謂根境二法體中無性。此頌相見無性。同於交蘆。

結解同所因。聖凡無二路。汝觀交中性。空有二俱非。迷晦卽無明。發明便解脫。

吳興曰。欲明解結。泛舉所因。所因者六根也。前諸佛同告云。汝欲識知生死結根。乃至速證安樂解脫。惟汝六根。更非他物。正同此義。孤山曰。汝觀下重牒前喻。令審觀也。言空則蘆有外相。言有則蘆中本空。以喻根境妄執似有。其體元空。迷晦下。頌知見立知。及知見無見等。

解結因次第。六解一亦亡。根選擇圓通。入流成正覺。

溫陵曰。躡前結解之義。起後圓通之文也。六解則根拔。一亡則湛圓。選得圓根。則入聖流。證聖果矣。陀那微細識。習氣成暴流。真非真恐迷。我常不開演。溫陵曰。陀那下。頌根結初結之由也。陀那此翻執持。執持種子。發起現行。卽第八梨耶。含藏種子爲習氣。積生識浪爲暴流。湛由是分。結由是起也。此識依真如。合生滅。雜乎真妄之間。故曰真非真也。若以爲真。恐迷妄習而自誤。以爲非真。恐迷自性而外求。故權小教中皆不開演也。深密經曰。阿陀那識甚微細。一切種子成暴流。我於凡愚不開演。恐彼分別執爲我。外道所執神我。卽此識也。自心取自心。非幻成幻法。不取無非幻。非幻尚不生。幻法云何立。

溫陵曰。頌解結入圓之要也。一切諸法惟心所現。而於中取著。妄成根結。是自心取自心。非幻成幻法也。由妄取故。有幻非幻。若不妄取。非幻亦無。非幻尚無。幻法何有。幻法不立。則根塵頓淨。圓通現前矣。

是名妙蓮華。金剛王寶覺。如幻三摩提。彈指超無學。此阿毘達磨。十方薄伽梵。一路涅槃門。

溫陵曰。此結頌也。此之法門。於淨不著。於染不汙。名妙蓮華。根境結惑。擬之則銷。名金剛王覺。卽爲無爲。亡情絕解。名如幻正受。依此修進。一彈指間。可超無學而入圓位也。阿毘達磨。云無比法。十方如來。迥出生死。速證寂常。莫不由斯。故曰十方薄伽梵。一路涅槃門。薄梵尊號。具六義。謂自在。熾盛。端嚴。名稱。吉祥。尊貴。孤山曰。彈指超無學。顯三止

之功也。若入地住。則超小乘阿羅漢位。縱入相似。亦超無學。以同除四住。此處爲齊。若伏無明。三藏則劣。又縱在觀行。亦超無學。如太子處胎。貴壓羣臣。頻伽在殼。聲逾衆鳥。

於是阿難。及諸大衆。聞佛如來無上慈誨。祇夜伽陀。雜糅精瑩。妙理清徹。心目開明。歎未曾有。阿難合掌。頂禮白佛。我今聞佛無遮大悲。性淨妙常。真實法句。心猶未達。六解一二。舒結倫次。惟垂大慈。再愍斯會。及與將來。施以法音。洗滌沉垢。

溫興曰。祇夜。云應頌。又云重頌。卽頌上長行也。伽陀。云諷頌。亦略云偈。不因長行。但諷美而頌之。二頌合明。故云雜糅精瑩。此指能詮也。妙理清徹。此謂所詮也。溫陵曰。無遮大悲。言其博濟也。性淨妙常。真實法句。則真妄兩忘。稱性之談也。沉垢微細。結惑也。長水曰。由前偈云。解結因次第。六解一亦二。故此疑之。

卽時如來於師子座。整涅槃僧。歛僧伽梨。攬七寶几。引手於几。取劫波羅天所奉華巾。於大眾前。縮成一結。示阿難言。此名何等。阿難大眾。俱白佛言。此名爲結。於是如來縮疊華巾。又成一結。重問阿難。此名何等。阿難大眾。又白佛言。此亦名結。如是倫次。縮疊華巾。總成六結。一一結成。皆取手中所成之結。持問阿難。此名何等。阿難大眾。亦復如是。次第酬佛。此名爲結。

溫陵曰。涅槃僧。裏衣也。僧伽梨。大衣也。劫波羅。云時分。卽夜摩天也。補註曰。由阿難未達六解一二。舒結倫次。故如來示一巾成六結。令悟六解則一

云。示縮結之有次第。令悟舒結之有倫次也。

佛告阿難。我初縮巾。汝名爲結。此疊華巾。先實一條。第二第三。云何汝曹復名爲結。阿難白佛言。世尊。此實疊華緝績成巾。雖本一體。如我思惟。如來一縮得一結名。若百縮成。終名百結。何況此巾祇有六結。終不至七。亦不停五。云何如來只許初時。第二第三。不名爲結。佛告阿難。此實華巾。汝知此巾元止一條。我六縮時。名有六結。汝審觀察。巾體是同。因結有異。於意云何。初縮結成。名爲第一。如是乃至第六結生。吾

今欲將第六結名。成第一不。不也。世尊。六結若存。斯第六名。終非第一。縱我歷生。盡其明辯。如何令是六結亂名。佛言。如是。六結不同。循顧本因。一巾所造。令其雜亂。終不能成。則汝六根。亦復如是。畢竟同中。生畢竟異。

吳興曰。同。謂一真之性。理本無差。譬巾之體也。異。謂六根之精。事用有別。如巾之結也。補註曰。此謂六結若存。則倫次不容雜亂。下言六結若解。則一六俱亡。

佛告阿難。汝必嫌此六結不成。願樂一成。復云何得。阿難言。此結若存。是非鋒起。於中自生。此結非彼。彼結非此。如來今日若總解除。結若不生。則無彼此。尚不名一。六云何成。佛言。六解一亡。亦復如是。

溫陵曰。不成。謂是非鋒起。不成一體也。願樂一成。莫非解除。結惑不生。則同異圓泯。故曰。尚不名一。六云何成。吳興曰。六根之精。元是一真之性。以隨緣故。在眼曰見精。在耳曰聽精等。此皆如第二月。捏所成故。若能隨根脫粘內伏。六既融一。一亦斯

亡。如解結已。巾亦無用。

由汝無始心性狂亂。知見妄發。發妄不息。勞見發塵。如勞目睛。則有狂華。於湛精明。無因亂起。一切世間山河大地。生死涅槃。皆卽狂勞顛倒華相。

吳興曰。知見發妄。此屬能見之相。勞見發塵。卽對所見之境。惟妄與勞。五住備矣。如勞目睛下。雙喻其義。一切世間下。示塵勞之相。

阿難言。此勞同結。云何解除。如來以手將所結巾。偏掣其左。問阿難言。如是解不。不也。世尊。旋復以手偏

牽右邊。又問阿難。如是解不。不也。世尊。佛告阿難。吾今以手左右各牽。竟不能解。汝設方便。云何解成。阿難白佛言。世尊。當於結心。解卽分散。佛告阿難。如是如是。若欲除結。當於結心。

吳興曰。左右牽掣。俱不能解。喻觀二邊。皆不能破。根本無明。凡夫外道。以斷常爲二邊。二乘菩薩。以空有爲二邊。雖曰伏斷。猶存巾結。若欲除結。當於結心者。知見立知。卽名爲結。觀知中道。是謂結心。結不離巾。解之則一。知不異道。亡之則中。補註曰。

上心性狂亂等。示其根結之由。展轉虛妄。此掣巾等。示其解結之方也。

阿難。我說佛法。從因緣生。非取世間和合麤相。

吳興曰。旣令解結。當於結心。欲使選根而修圓行。故示佛法從因緣生。反顯若無因緣。佛法無由而生也。如前文云。譬如琴瑟。雖有妙音。若無妙指。終不能發。是則圓修定慧。是今因緣。若三藏中事六度等。皆是世間和合麤相。

如來發明世出世法。知其本因。隨所緣出。如是乃至

恒沙界外一滴之雨。亦知頭數。現前種種。松直棘曲。鵠白烏玄。皆了元由。是故阿難。隨汝心中選擇六根。根結若除。塵相自滅。諸妄銷亡。不真何待。

孤山曰。世謂六凡。出世謂四聖。知此十界皆因於心。隨無明之染緣。則出九界。隨教行之淨緣。則出佛界。故法華云。佛種從緣起。涅槃云。亦有因緣。因滅無明。則得熾然三菩提燈。吳興曰。佛有權實二智。實智冥理。權智鑑物。發明世出世法。乃至知其種種元由者。皆權智所鑑也。既於情無情。照了不

昧。顯今所說解結之法。及選根之義。悉是鑑物宜然。固無差謬矣。長水曰。選擇六根者。前文云。若能於此悟圓通根。與不圓根。日劫相倍。故令選擇。

阿難。吾今問汝。此劫波羅巾。六結現前。同時解縈。得同除不。不也。世尊。是結本以次第縮生。今日當須次第而解。六結同體。結不同時。則結解時。云何同除。

吳興曰。縮巾成結。雖有次第。粘湛成根。必無倫緒。故不可以喻而難於法也。蓋言見聞覺知六用差別。如次第縮生也。選擇六根。隨於一根發觀。如次

楞嚴經會解 卷之五
第而解也。愍師云。意明六根不可齊觀。但依一根入證。自然銷六。斯會經意焉。

佛言。六根解除。亦復如是。此根初解。先得人空。空性圓明。成法解脫。解脫法已。俱空不生。是名菩薩從三摩地。得無生忍。

吳興曰。小乘析觀。乃是作意先破人執。次破法執。然後會入空平等理。大乘體觀。人法無殊。空非前後。今言此根初解。先得人空者。亦猶前文如澄濁水。沙土自沉。蓋任運而然也。沈師以天台別教釋

之。孤山斥云。其失非小。應知人空是破五陰假名。卽見惑也。法空是破五陰實法。卽思惑也。乃至破涅槃淨法。卽無明也。俱空不生。卽平等空。所空旣盡。能空亦滅。如前火木。然諸薪已。亦復自然。如是三空。皆以中道而爲觀體。苟非此者。何異解巾左。右牽掣乎。

阿難及諸大衆。蒙佛開示。慧覺圓通。得無疑惑。一時合掌。頂禮雙足。而白佛言。我等今日身心皎然。快得無礙。雖復悟知一六亡義。然猶未達圓通本根。世尊。

我輩飄零。積劫孤露。何心何慮。預佛天倫。如失乳兒。忽遇慈母。若復因此際會道成。所得密言。還同本悟。則與未聞無有差別。惟垂大悲。惠我祕嚴。成就如來。最後開示。作是語已。五體投地。退藏密機。冥佛冥授。溫陵曰。慧覺圓通。存乎一心。已蒙開示。故身心皎然。圓通本根。冥乎萬法。猶未通達。故冥佛冥授也。密言。卽發明慧覺之言也。祕嚴。卽圓通本根祕要也。慧覺圓通。我固有之。故雖因密言。還同本悟。若不開祕嚴。則與未聞無異。故別求開示也。二十五

聖於根塵七大各悟圓通。是知本根冥乎萬法也。佛不顯說。而因衆敷陳。是謂冥授也。退藏密機。卽息慮凝心也。

爾時世尊。普告衆中諸大菩薩。及諸無漏大阿羅漢。汝等菩薩。及阿羅漢。生我法中。得成無學。吾今問汝。最初發心。悟十八界。誰爲圓通。從何方便。入三摩地。孤山曰。此下二十五聖觀十八界。及以七大。乃是開合之殊耳。識大則合於六識。根大則合於六根。餘之五大。則總收六境。以六境之體。不出地水火

風及空故也。但言十八。則已攝十。故前文云。十方如來。於十八界。一一修行。皆得圓滿。無上菩提。又此十八。只是六根。以各開根境識三故。是則言六。其義亦周。故前文云。令汝生死輪轉。安樂妙常。同是六根。更非他物。

憍陳那五比丘。卽從座起。頂禮佛足。而白佛言。我在鹿苑。及於雞園。觀見如來。最初成道。於佛音聲。悟明四諦。佛問比丘。我初稱解。如來印我名阿若多。妙音密圓。我於音聲。得阿羅漢。佛問圓通。如我所證音聲。

爲上。

孤山曰。妙音密圓者。密悟圓理也。或曰。涅槃說身因而皆小聖。淨名入不二則俱大士。惟茲二十五聖。大小相參。而云方便多門。歸元不二。且陳那身子。近悟偏空。普賢彌勒。久證圓理。久近兩異。偏圓二殊。安得圓通。其歸一揆。對曰。涅槃叙昔。則小無大分。淨名方等。則大隔小乘。其談所證。豈得相混。至若今經。二乘作佛。與法華同塗。闡提有性。將涅槃共轍。教已開顯。偏卽圓融。故使鹿苑之所證。同

成一乘之頓理。均乎普賢。諒無慙德。此約實行聲聞也。若乃內祕大道。外現小乘。則鹿苑以來。何嘗非大。既經發迹。一揆何疑。此約權行聲聞也。悟理既同。誰拘遠近。以此觀之。則大小相參之說。怡然理順。遠近偏圓之惑。渙然冰釋。吳興曰。夫開權顯實之說。惟諸佛祕要之事。非諸菩薩羅漢所能顯示。其猶禮樂征伐。自天子出。非諸侯之事。今佛所問。最初發心。悟十八界。誰爲圓通者。且欲諸聖各述本根。權實之道耳。在昔方便。未會真實。諸聲聞

人言與菩薩同入法性。孰不自謂悟入圓通。如陳那等。雖曰妙音密圓。但是聞生滅四諦。微密圓悟。未可混同。如來藏理。故中阿含云。我至波羅奈。擊鈔。其露鼓。又云。如來說法。初中後鈔。豈彼鈔名。便同法華之鈔乎。只如下文說緣覺聲聞。云勝鈔現圓。及勝性現圓。又說大梵善見。身心鈔圓。及鈔見圓證。豈此鈔圓。亦同圓覺鈔明之性乎。應知如來先令諸聖次第說竟。後告文殊言。此二十五無學諸大菩薩及阿羅漢。各說最初成道方便。皆言修

習真實圓通。彼等修行。實無優劣前後差別。斯則開權會實之正文也。文殊偈云。聖性無不通。順逆皆方便。蓋演如來之旨也。主伴相濟。雅合其宜。又若陳那等本大迹小。鹿苑所證。不亦小平。豈顯本後。翻令漸初。密悟圓理。天台化儀四教。龍樹二種法輪。顯露祕密。俱無此說。吾宗義學。請熟思之。

優波尼沙陀。卽從座起。頂禮佛足。而白佛言。我亦觀佛最初成道。觀不淨相。生大厭離。悟諸色性。以從不淨。白骨微塵。歸於虛空。空色二無。成無學道。如來印

我名尼沙陀。塵色旣盡。妙色密圓。我從色相。得阿羅漢。佛問圓通。如我所證。色因爲上。

溫陵曰。優波尼沙陀。此翻近少。亦云塵性。謂微塵是色之少分也。因塵悟解。故得此名。昔多貪欲。佛令作不淨觀。長水曰。因觀色塵。本如來藏。故曰悟諸色性。吳興曰。不然。旣云觀佛最初成道。正是小乘無漏行法。言悟諸色性者。斯乃聲聞悟性念處也。南嶽師云。觀五陰理性。名性念處。故雜心論偈云。是身不淨相。真實性常定。諸受及心法。亦復如

是說以從不淨白骨微塵歸於虛空者。由多貪欲。修對治法。成就九想。發真破惑。卽壞法羅漢也。九想成時。得慧解脫。於諸色相發明無漏。故云妙色密圓。

香巖童子。卽從座起。頂禮佛足。而白佛言。我聞如來教我諦觀諸有爲相。我時辭佛。宴晦清齋。見諸比丘。燒沉水香。香氣寂然。來入鼻中。我觀此氣。非木非空。非煙非火。去無所著。來無所從。由是意銷。發明無漏。如來印我得香巖號。塵氣倏滅。妙香密圓。我從香巖。

得阿羅漢。佛問圓通。如我所證。香巖爲上。

樛李曰。宴。安息也。晦。冥寂也。清靜之室。謂之清齋。資中曰。非木等者。觀性空也。吳興曰。凡言性空。必推四性。今當以木爲自。煙火爲他。和合爲共。空爲無因。此似衍門觀幻有卽空之相。下諸聲聞亦多是小乘觀實有滅空之義。小衍雖殊。所證圓通。同一真諦耳。若諸菩薩所悟。須約中道第一義諦言之。應有歷別圓融之異。經雖隱畧。理各該通。如淨名室內。三十二大士說入不二法門。天台所解亦

分圓別。豈以不二混同諸入乎。先云香嚴童子。則從菩薩受稱。復云得阿羅漢。蓋叙昔日所證。如下文月光童子。初得小果。後於佛所得童真名。預菩薩會。以彼驗此。名實可知。

藥王藥上。二法王子。并在會中五百梵天。卽從座起。頂禮佛足。而白佛言。我無始劫。爲世良醫。口中嘗此娑婆世界草木金石。名數凡有十萬八千。如是悉知苦酢鹹淡甘辛等味。并諸和合俱生變異。是冷是熱。有毒無毒。悉能徧知。承事如來了。知味性非空非有。

非卽身心。非離身心。分別味因。從是開悟。蒙佛如來印我昆季。藥王藥上二菩薩名。今於會中爲法王子。因味覺明。位登菩薩。佛問圓通。如我所證。味因爲上。孤山曰。苦酢等六味也。衆味共成。名和合味。直尔采用。名俱生味。修鍊炮炙。名變異味。吳興曰。由事佛故。必聞正法。卽於味性了生無生。空有。謂味塵也。身心。謂舌識也。以味從合中知。故相對言之。味非空故。非離身心。味非有故。非卽身心。中道之性。於是乎顯。

跋陀婆羅。并其同伴十六開士。卽從座起。頂禮佛足。而白佛言。我等先於威音王佛。聞法出家。於浴僧時。隨列入室。忽悟水因。既不洗塵。亦不洗體。中間安然。得無所有。宿習無忘。乃至今時。從佛出家。令得無學。彼佛名我跋陀婆羅。妙觸宣明。成佛子住。佛問圓通。如我所證。觸因爲上。

因孤山曰。跋陀婆羅。此云賢守。亦云賢護。自守護賢德。亦守護衆生。資中曰。準法華經。有二萬億威音王佛前後出世。最初佛像法中。此跋陀等爲增上。

慢。毀常不輕。故千劫墮阿鼻獄。罪畢。值後佛出家。吳興曰。水因。謂所觸之因也。塵體。卽能觸之緣也。塵旣無染。體亦常淨。能所如幻。二邊俱空。故中間覺觸之心。安然契性矣。泐潭曰。觸具三和。今翻爲三德祕藏。故名妙觸宣明也。

摩訶迦葉。及紫金光比丘尼等。卽從座起。頂禮佛足。而白佛言。我於往劫於此界中。有佛出世。名日月燈。我得親近。聞法修學。佛滅度後。供養舍利。然燈續明。以紫光金塗佛形像。自余以來。世世生生。身常圓滿。

紫金光聚。此紫金光比丘尼等。卽我眷屬。同時發心。我觀世間六塵變壞。惟以空寂。修於滅盡。身心乃能度百千劫。猶如彈指。我以空法。成阿羅漢。世尊說我頭陀爲最。妙法開明。銷滅諸漏。佛問圓通。如我所證。法因爲上。

溫陵曰。摩訶迦葉。大飲光也。其身金色。光吞日月。因觀塵變。悟法空寂。遂修滅盡定。以滅意根。不緣法塵。得無生滅。故超百千劫。如彈指頃。于今於雞足山待彌勒。乃入此定也。頭陀。新云杜多。此翻抖

擻。以能抖擻法塵爲號。孤山曰。修於滅盡者。卽九次第定中。第九滅受想定也。長水曰。紫金光尼在家時婦也。補註曰。紫金光旣同時發心。則非一世眷屬也。

阿那律陀。卽從座起。頂禮佛足。而白佛言。我初出家。常樂睡眠。如來訶我爲畜生類。我聞佛訶。啼泣自責。七日不眠。失其雙目。世尊示我樂見照明金剛三昧。我不因眼。觀見十方。精真洞然。如觀掌果。如來印我成阿羅漢。佛問圓通。如我所證。旋見循元。斯爲第一。

長水曰。那律。卽阿菟樓駄。此云無貧。亦云如意。乃白飯王子也。過去世以一食施辟支。感九十一劫受如意樂。孤山曰。增一阿含云。佛在給孤園爲衆說法。那律於中眼睡。佛說偈訶曰。咄咄何爲睡。螺螄蚌蛤類。一睡一千年。不聞佛名字。那律於是達曉不眠。眼根便失。因是修禪。得四大淨色半頭而見。觀三千界猶如掌果。今云金剛三昧。觀見十方。精真洞然。而與昔異者。此經開顯。故約內祕以談。昔引物機。乃約現小而說。吳興曰。阿含云。修禪。蓋

總畧而示。今云金剛三昧。則別顯其名。非謂金剛惟喻大定。如阿難入電光三昧。斷最後思惑。亦名金剛三昧。此喻小乘無漏之智耳。智論云。那律天眼。四大造色半頭清淨。佛天眼。四大造色徧頭清淨。天台智者云。三藏佛。全頭天眼。徹見無礙。故知全半之名。但約分滿相望。不以大小爲異也。又若據阿含觀大千。此經見十方。謂有優劣。固未可也。彼經云。那律天眼見十方域。不亦同乎。掌果之譬。旣齊。精真之言何別。下文明善現天。尚云精真現

楞嚴經會解 卷之五
前。陶鑄無礙。況今羅漢發真無漏。豈不得云精真洞然邪。旋見循元者。旋大千之見。循真空之元。見盡元明。圓通著矣。

周利槃特迦。卽從座起。頂禮佛足。而白佛言。我闕誦持。無多聞性。最初值佛。聞法出家。憶持如來一句伽陀。於一百日。得前遺後。得後遺前。佛愍我愚。教我安居。調出入息。我時觀息。微細窮盡。生任異滅。諸行剎那。其心豁然。得大無礙。乃至漏盡。成阿羅漢。住佛座下。印成無學。佛問圓通。如我所證。反息循空。斯爲第

一。
溫陵曰。槃特。此云繼道。卽誦帚比丘也。長水曰。特迦亦云蛇奴。於路所生。過去爲大法師。祕吝佛法。不肯教人。後感愚鈍。以宿善故。遇佛出家。五百比丘同教一偈。經九十日不成。佛令數息攝心。因而了悟。

憍梵鉢提。卽從座起。頂禮佛足。而白佛言。我有口業。於過去劫。輕弄沙門。世世生生。有牛疔病。如來示我一味清淨心地法門。我得滅心。入三摩地。觀味之知。

非體非物。應念得超世間諸漏。內脫身心。外遺世界。遠離三有。如鳥出籠。離垢銷塵。法眼清淨。成阿羅漢。如來親印。登無學道。佛問圓通。如我所證。還味旋知。斯爲第一。

溫陵曰。憍梵鉢提。此云牛呵。牛凡不食亦事虛哨。此人口如牛之哨。乃輕弄報也。佛爲遮謗。賜之數珠。令常念佛。是謂一味心地法門。能滅心緣。得入正受。亦因教觀。舌根嘗味入道。不著塵味。不隨妄知。是謂還味旋知也。孤山曰。了味無味。名爲一味。

雖舉味塵。益顯於舌。故卽云觀味之知。能知乃舌耳。非體舌也。非物味也。內脫身心。卽正報解脫。外遺世界。卽依報解脫也。

畢陵伽婆蹉。卽從座起。頂禮佛足。而白佛言。我初發心。從佛入道。數聞如來說諸世間不可樂事。乞食城中。心思法門。不覺路中毒刺傷足。舉身疼痛。我念有知。知此深痛。雖覺覺痛。覺清淨心。無痛痛覺。我又思惟。如是一身。寧有雙覺。攝念未久。身心忽空。三七日中。諸漏虛盡。成阿羅漢。得親印記。發明無學。佛問圓

通。如我所證。純覺遺身。斯爲第一。
孤山曰。畢陵伽婆蹉。此云餘習。昔爲婆羅門。故餘習多慢。如罵河神爲婢。非彼實心。蓋習氣也。溫陵曰。不可樂事。一切苦事也。思不可樂法。而觸不可樂事。吳興曰。知卽覺也。刺傷足時。雖有能覺之心。覺於所覺之痛。反觀覺心。本自清淨。無有能所。所覺屬身識。能覺屬意識。由身識生已。次起意識。分別前法。故曰雙覺。卽上文云。我念有知。知此深痛也。覺清淨心。卽是純覺。無痛痛覺。故曰遺身。補註

曰。無痛痛覺者。卽是無所覺。復無能覺也。

須菩提。卽從座起。頂禮佛足。而白佛言。我曠劫來。心得無礙。自憶受生。如恒河沙。初在母胎。卽知空寂。如是乃至十方成空。亦令衆生證得空性。蒙如來發性覺真空。空性圓明。得阿羅漢。頓入如來寶明空海。同佛知見。卽成無學。解脫性空。我爲無上。佛問圓通。如我所證。諸相入非。非所非盡。旋法歸無。斯爲第一。

吳興曰。諸聲聞中。惟此空生。并下身子。滿慈三人。所叙昔因。則云我曠劫來。心得無礙等。洎談所證。

亦阿羅漢耳。權實之道未易甄分。嘗試訂之。須明
二義。一者若據曠劫心得無礙。則似此身以前曾
護無漏。今生值佛蒙發性覺。諒非小乘。蓋由在昔
方等般若之中。彈訶淘汰之際。顯聞圓教。密悟大
猷。既涉開權。故彰實證。是則羅漢之名。卽同法華
真阿羅漢也。二者若約內祕外現。且作權教而解。
亦有理存焉。以聲聞人所得宿命。能知八萬劫事。
今逆談所見。謂之無礙也。雖云在胎知空。乃至令
他證性。猶未斷結使。故蒙佛開發。方成無學。若介

性覺真空。乃至下文深達實相。皆就小宗分別無
咎。名同體異。斯例甚多。故沈師亦以石室見佛法
身。釋茲空義。資中曰。初以單空空於諸相。故云諸
相入非。次以重空空其空相。故云非所非盡。

舍利弗。卽從座起。頂禮佛足。而白佛言。我曠劫來。心
見清淨。如是受生如恒河沙。世出世間種種變化。一
見則通。獲無障礙。我於路中。逢迦葉波兄弟相逐。宣
說因緣。悟心無際。從佛出家。見覺明圓。得大無畏。成
阿羅漢。爲佛長子。從佛口生。從法化生。佛問圓通。如

我所證。心見發光。光極知見。斯爲第一。

溫陵曰。心見眼識也。心見發光。光極知見者。由心見發明而圓照萬法也。身子智慧第一。聲德居長。只故稱長子。吳興曰。世出世間。四諦之境也。種種變化。生滅之相也。由眼識明利。故云一見則通等。此且約解言之。圓師謂。餘經皆言身子路逢馬勝。聞諸法從緣生而悟道。今云逢迦葉波者。彼對小機。止聞小法。此對大機。乃聞大道。所聞既異。從人亦殊。此恐不然。觀身子在家屬十二年前。故不可以

人而異於法也。況今文云。聞說因緣。義同馬勝。緣生之語。悟心無際。卽初果見道。故阿含明。初聞馬勝說法。得須陀洹果。後至佛所。七日徧達佛法。又云。經十五日得阿羅漢。以是言之。見覺明圓。亦從小說設作大解。則前之悟心須該四果。後云羅漢方受真名。補註曰。餘經說身子目連等。從馬勝聞因緣義。與今說異者。或可聞因緣義非止一人。彼此互出。

普賢菩薩。卽從座起。頂禮佛足。而白佛言。我已曾與

恒沙如來爲法王子。十方如來教其弟子菩薩根者。修普賢行。從我立名。世尊。我用心聞。分別衆生所有知見。若於他方恒沙界外。有一衆生。心中發明普賢行者。我於尔時乘六牙象。分身百千。皆至其處。縱彼障深。未得見我。我與其人暗中摩頂。擁護安慰。令其成就。佛問圓通。我說本因。心聞發明。分別自在。斯爲第一。

樛李曰。行彌法界曰普。位鄰極聖曰賢。此非地前之賢。乃是金剛喻定。居衆伏之頂。名之爲賢。温陵

曰。凡具大根。修菩薩行。皆名普賢之行。心聞耳識也。分別衆生知見者。擇普賢行而成就之也。孤山曰。心聞發明。內證也。分別自在。外用也。

孫陀羅難陀。卽從座起。頂禮佛足。而白佛言。我初出家。從佛入道。雖具戒律。於三摩地。心常散動。未獲無漏。世尊教我及拘絺羅。觀鼻端白。我初諦觀。經三七日。見鼻中氣。出入如煙。身心內明。圓洞世界。徧成虛淨。猶如琉璃。煙相漸銷。鼻息成白。心開漏盡。諸出入息。化爲光明。照十方界。得阿羅漢。世尊記我。當得菩

提佛問圓通。我以銷息。息久發明。明圓滅漏。斯爲第一。
孤山曰。孫陀羅。云好愛妻名也。難陀。云歡喜。已號
也。慈恩兩名共翻。艷喜。爲簡放牛難陀。故標其妻。
宋乃如來親弟也。溫陵曰。前數息依根。所以攝心。此
觀自依識。所以駐心也。息由風火而起。鼓煩惱濁。
故其狀如煙。昧者不覺。惟諦觀能見。六交見火燒
息。能爲黑煙紫燄。皆煩惱濁所發也。淨觀發明。則煩
濁漸銷。故內明外虛。而煙銷成白。及乎漏盡。無復

煩惱。內瑩發光。故出入息化爲光明也。吳興曰。由
觀鼻識。似發十六特勝禪也。此禪始從知息出入。
乃至觀於棄捨。攝四念處。能見三界九地所證境
界。故云圓洞世界等。又能於地地中。以觀照了。破
四顛倒。發真無漏。故云心開漏盡等。亦可是通明
之相。禪門備焉。記卽印成。當猶是也。菩提云道。如
前文云得親印記。發明無學。若作授記。未來當得
佛果菩提者。卽二酥密記。或醍醐顯記。
富樓那彌多羅尼子。卽從座起。頂禮佛足。而白佛言。

我曠劫來。辯才無礙。宜說苦空。深達實相。如是乃至
恒沙如來祕密法門。我於衆中。微妙開示。得無所畏。
世尊知我有大辯才。以音聲輪。教我發揚。我於佛前。
助佛轉輪。因師子吼。成阿羅漢。世尊印我。說法無上。
佛問圓通。我以法音。降伏魔冤。銷滅諸漏。斯爲第一。
溫陵曰。說法第一。辯才無礙。因以降魔滅漏。皆舌
識力也。佛以身口意三輪應物無滯。音聲卽口輪
也。吳興曰。宜說下。指小乘法。如是下。示大乘義。始
阿含終般若。故云乃至。增一稱滿。慈子說法最爲

第一。大品中轉教諸菩薩摩訶般若。卽其相也。追
叙得道若權若實。如前辨之。

優波離。卽從座起。頂禮佛足。而白佛言。我親隨佛逾
城出家。親觀如來六年勤苦。親見如來降伏諸魔。制
諸外道。解脫世間貪欲諸漏。承佛教戒。如是乃至三
千威儀。八萬微細。性業遮業。悉皆清淨。身心寂滅。成
阿羅漢。我是如來衆生綱紀。親印我心。持戒修身。衆
推無上。佛問圓通。我以執身。身得自在。次第執心。心
得通達。然後身心一切通利。斯爲第一。

孤山曰。優波離。此云上首。以其持律爲衆綱紀故。或翻近執。以佛爲太子時。彼爲親近執事之臣故。溫陵曰。言親隨親觀。乃至承教。皆明身識欽承也。行住坐臥律儀。各二百五十。對三聚成三千。復以三千配身口七支。成二萬一千。復配四分煩惱。成八萬四千。性業。卽殺盜姪等根於性者。遮業。卽支未愆失。因過遮止者。律中得度。波離第一。僧中得度。陳那最初。故今堂置陳那。壇直波離。各立本也。吳興曰。圓師謂次第執心者。由戒清淨故發定慧。

也。此恐未然。按下文云。先持聲聞四棄八棄。執身不動。後行菩薩清淨律儀。執心不起。是則執心非約定慧明矣。然以身心配于大小。此據麤細一往分之。菩薩非不檢身。聲聞亦防意地。如諸篇聚制遠方便。豈非意地乎。今所叙者正言其小。故執身及心。從麤至細。以防身識之微也。身識旣滅。真智現前。斯所謂戒淨有智慧。使得第一道。

大目犍連。卽從座起。頂禮佛足。而白佛言。我初於路乞食。逢遇優樓頻螺伽耶那提。三迦葉波。宣說如來。

因緣深義。我頓發心。得大通達。如來惠我袈裟著身。
鬚髮自落。我遊十方。得無罣礙。神通發明。推爲無上。
成阿羅漢。寧惟世尊。十方如來。歎我神力。圓明清淨。
自在無畏。佛問圓通。我以旋湛。心光發宣。如澄濁流。
久成清瑩。斯爲第一。

孤山曰。優樓頻螺。此云木瓜瘡。胸前有瘡如木瓜。
故伽耶。山名。卽象頭山也。亦云城。城近此山。故那。
提。河名。一兄二弟。故身子云。逢迦葉波兄弟。卽其。
人也。溫陵曰。因緣深義。謂非世間和合。麤相。乃發。

明世出世法。故因之發心。得大通達。神通如意也。
旋湛者。旋意識而復妙湛。故久澄清瑩。通力圓明。
清淨自在也。吳興曰。神名天心。通名慧性。而此心。
性卽意識發明也。大乘發如來藏。小乘發根本禪。
六神通中。惟漏盡通。是其內證。餘之五通。皆屬外。
用。

烏芻瑟摩。於如來前。合掌頂禮佛之雙足。而白佛言。
我常先憶久遠劫前。性多貪欲。有佛出世。名曰空王。
說多姪人。成猛火聚。教我徧觀百骸四支。諸冷煖氣。

神光內凝。化多姪心。成智慧火。從是諸佛皆呼召我。名爲火頭。我以火光三昧力故。成阿羅漢。心發大願。諸佛成道。我爲力士。親伏魔冤。佛問圓通。我以諦觀身心暖觸。無礙流通。諸漏旣銷。生大寶燄。登無上覺。斯爲第一。

溫陵曰。烏芻瑟摩。云火頭。卽火頭金剛也。多姪之人。本由暖觸。迫發生爲欲火。死爲業火。業力增熾。故成猛火聚也。吳興曰。徧觀四大。皆是觸塵之境。百骸四支。地也。諸冷暖氣。卽水火風也。三昧旣著。

故曰神光內凝。以多欲人。火大徧盛。故變姪火而成智火。成阿羅漢下。謂成小果。後發大願。將非普現色身。以執金剛神。輔佛揚化者乎。

持地菩薩。卽從座起。頂禮佛足。而白佛言。我念往昔。普光如來。出現於世。我爲比丘。常於一切要路津口。田地險隘。有不如法。妨損車馬。我皆平填。或作橋梁。或負沙土。如是勤苦。經無量佛。出現於世。或有衆生。於闌闌處。要人擎物。我先爲擎。至其所詣。放物卽行。不取其直。毘舍浮佛。現在世時。世多饑荒。我爲負人。

無問遠近。惟取一錢。或有車牛被於泥溺。我有神力。爲其推輪。拔其苦惱。時國大王。延佛設齋。我於尔時。平地待佛。毘舍如來。摩頂謂我。當平心地。則世界地。一切皆平。我卽心開。見身微塵。與造世界所有微塵。等無差別。微塵自性。不相觸摩。乃至刀兵。亦無所觸。我於法性。悟無生忍。成阿羅漢。廻心今入菩薩位中。聞諸如來。宣妙蓮華。佛知見地。我先證明。而爲上首。佛問圓通。我以諦觀身界二塵。等無差別。本如來藏。虛妄發塵。塵銷智圓。成無上道。斯爲第一。

吳興曰。身界微塵。乃至刀兵者。以此皆是地大所造之色。卽因緣所生法也。微塵無差。空也。自性不觸。中也。三諦具足。非如來藏乎。悟無生等。由分證法身而權取小果。故以無生忍簡之。初自度。後化他。是謂廻心也。毘舍浮。云徧一切自在。

月光童子。卽從座起。頂禮佛足。而白佛言。我憶往昔。恒河沙劫。有佛出世。名爲水天。教諸菩薩。修習水觀。入三摩地。觀於身中。水性無奪。初從涕唾。如是窮盡。津液精血。大小便利。身中旋復。水性一同。見水身中。

與世界外浮幢王刹諸香水海等無差別。我於是時初成此觀。但見其水。未得無身。當爲比丘。室中安禪。我有弟子。窺牕觀室。惟見清水。徧在室中。了無所見。童稚無知。取一瓦礫。投於水內。激水作聲。顧盼而去。我出定後。頓覺心痛。如舍利弗遭違害鬼。我自思惟。今我已得阿羅漢道。久離病緣。云何今日忽生心痛。將無退失。爾時童子捷來我前。說如上事。我則告言。汝更見水。可卽開門入此水中。除去瓦礫。童子奉教。後入定時。還復見水。瓦礫宛然。開門除出。我後出定。

身質如初。逢無量佛。如是至於山海自在通王如來。方得亡身。與十方界諸香水海。性合真空。無二無別。今於如來。得童真名。預菩薩會。佛問圓通。我以水性一味流通。得無生忍。圓滿菩提。斯爲第一。

資中曰。準華嚴經。華藏海中有大蓮華。其蓮華中有諸香水。一一香水海。爲諸佛刹。世界之種。華藏世界在香水中。故云浮幢王刹。華藏二十重累高如幢。最爲高大。故稱王。今觀身水與彼海同。故曰浮幢王刹諸香水海也。初成此觀。但見其水者。此

定果色隨心所變。如十徧處。入定則有。出定則無。不同業果色共業同感。不造世業方得清淨。十徧處者。青黃赤白地水火風空識。此十。一切處皆有。如作青想。則一切處皆青也。吳興曰。得阿羅漢久離病緣等。按智論明諸聖人皆有身苦。如舍利弗風病。畢陵伽眼痛等。今言已得羅漢。久離病緣。實難銷會。此蓋過去曾取小果。既無見思惑業之事。是離分段病苦之緣。其時迴心却入三界。本無實疾。所以疑之。然此菩薩所修三昧。與前持地觀法

大同。但由無明尚在。未得無功用道。是故出定不知病緣。有作析法拙度解之者。誠不可也。方得亡身等。初證法身。分亡變易之身。身中水性。與香水海性。同合真如空藏之性。溫陵曰。月太陰。水精也。昔師水天。修習水觀。水性圓明。故號月光。水性無奪者。內之精血。外之剎海。水相雖異。而性不相奪。我於是時。至身質如初。叙作觀之緣也。舍利弗於恒河岸入定。遭違害鬼所擊。而出定頭痛。亦未得無身故也。漢州綿竹縣水觀和尚。迹同月光。佛陀

本傳云。師入火光定。其室如焚。亦此類也。違害。當作爲害。夜叉鬼王之名。乃身子過去世之怨也。

琉璃光法王子。卽從座起。頂禮佛足。而白佛言。我憶往昔經恒沙劫。有佛出世。名無量聲。開示菩薩本覺妙明。觀此世界及衆生身。皆是妄緣。風力所轉。我於余時。觀界安立。觀世動時。觀身動止。觀心動念。諸動無二。等無差別。我時了覺。此羣動性。來無所從。去無所至。十方微塵。顛倒衆生。同一虛妄。如是乃至三千大千一世界內。所有衆生。如一器中。貯百蚊蚋。啾啾

亂鳴。於分寸中。鼓發狂鬧。逢佛未幾。得無生忍。余時心開。乃見東方不動佛國。爲法王子。事十方佛。身心發光。洞徹無礙。佛問圓通。我以觀察風力無依。悟菩提心。入三摩地。合十方佛傳一妙心。斯爲第一。

吳興曰。界爲方位。故安立。世爲遷流。故動時。時卽過現未也。孤山曰。逢佛未幾者。未多也。溫陵曰。因風大圓悟。身心發光。洞徹無礙。號琉璃光。無量聲佛。亦依風大。開示菩薩。使知本覺無動。而身界之動。皆風力所轉。琉璃光。因是觀界。觀世。觀身。觀心。

遷流運止。悉惟風力。故曰諸動無二。由是覺了大
千羣動。皆卽狂勞。猶百蚊蚋。鼓於方寸耳。旣了狂
勞。乃見不動佛也。東爲羣動之本。而佛號不動。乃
卽動而靜者也。能卽動而靜。故身心無礙也。傳一
妙心者。知風力無依。萬動皆妄。而獨證無動本覺
也。

虛空藏菩薩。卽從座起。頂禮佛足。而白佛言。我與如
來定光佛所。得無邊身。尔時手執四大寶珠。照明十
方微塵佛刹。化成虛空。又於自心現大圓鏡。內放十

種微妙寶光。流灌十方。盡虛空際。諸幢王刹。來入鏡
內。涉入我身。身同虛空。不相妨礙。身能善入微塵國
土。廣行佛事。得大隨順。此大神力。由我諦觀。四大無
依。妄想生滅。虛空無二。佛國本同。於同發明。得無生
忍。佛問圓通。我以觀察虛空無邊。入三摩地。妙力圓
明。斯爲第一。

吳興曰。因觀四大色質。旣得無邊法身。爲顯此身
徧融一切。故執寶珠照十方等。而表示之。旣以珠
表色。復以鏡表心。色從心造。全體是心。故放寶光

灌十方等。華嚴云。清淨妙法身。湛然應一切。身同
虛空。法也。身入塵國。應也。說三乘法爲佛事。稱四
悉機爲隨順。

彌勒菩薩。卽從座起。頂禮佛足。而白佛言。我憶往昔
經微塵劫。有佛出世。名日月燈明。我從彼佛而得出
家。心重世名。好遊族姓。爾時世尊教我修習惟心識
定。入三摩地。歷劫以來。以此三昧。事恒沙佛。求世名
心。歇滅無有。至然燈佛出現於世。我乃得成無上妙
圓識心三昧。乃至盡空如來國土。淨穢有無。皆是我

心變化所現。世尊。我了如是惟心識故。識性流出無
量如來。今得授記。次補佛處。佛問圓通。我以諦觀十
方惟識。識心圓明。入圓成實。遠離依他。及徧計執。得
無生忍。斯爲第一。

溫陵曰。彌勒。正云梅怛利曳那。此翻慈氏。爲慈隆
卽世。悲臻後劫。愍物迷識。故示迹發明也。真際曰。
以不達徧計本空。依他幻有。故耽世名。好遊族姓。
惟心識定者。惟遮境有。識簡心空。惟有自心。心外
無法也。吳興曰。盡空者。謂盡虛空界所有佛國等。

惟心所現也。若以四土言之。心卽寂光。變化卽實報方便同居也。淨穢但是三土之相。互有起滅。故云有無。流出如來者。從法身識性。流出報應佛身也。孤山曰。求世名心歇滅無有者。相似位也。得成無上妙圓識心三昧者。分真位也。資中曰。圓成實等者三性也。一徧計所執性。橫執衆生壽者我及我所。乃至情非情異。有實體性。故周徧計度也。二依他起性。計有因緣。世間和合建立名相。執此假相。定從種生。雖無我執自然種性。假色心等爲種。卽證真如理也。

生五蘊等法也。三圓成實性。卽無漏智體及真如法界也。圓成如麻。依他如繩。徧計如蛇。今入圓成。大勢至法王子。與其同倫五十二菩薩。卽從座起。頂禮佛足。而白佛言。我憶往昔恒河沙劫。有佛出世。名無量光。十二如來。相繼一劫。其最後佛。名超日月光。彼佛教我念佛三昧。譬如有人。一專爲憶。一人專忘。如是二人。若逢不逢。或見非見。二人相憶。二憶念深。如是乃至從生至生。同於形影。不相乖異。十方如來。

憐念衆生。如母憶子。若子逃逝。雖憶何爲。子若憶母。如母憶時。母子歷生。不相違遠。若衆生心。憶佛念佛。現前當來。必定見佛。去佛不遠。不假方便。自得心開。如染香人。身有香氣。此則名曰香光莊嚴。我本因地。以念佛心。入無生忍。今於此界。攝念佛人。歸於淨土。佛問圓通。我無選擇。都攝六根。淨念相繼。得三摩地。斯爲第一。

溫陵曰。觀經云。以智慧光普照一切。令離三途。得無上力。名大勢至。又云。夫念佛者。不得一彈指頃。

念世五欲。是謂繫念。譬如有人下。示必須繫念。然後相應。不專念佛。則雖逢不逢。雖見不見。染香則襲香。念佛則見佛。故以念佛妙熏。名香光莊嚴也。吳興曰。母憶子。如人專憶。子逃逝。如人專忘。問前云。逢不逢等。此何但云。雖憶何爲。答。縱得逢見。不蒙法利。與逃逝無異。舍衛九億家。不其然乎。入無生忍者。以證驗修。則念佛之心。不可單約事相而解。念存三觀。佛具三身。心破三惑。無生忍位。方可入焉。資中引觀經是心是佛等釋之。斯亦大要也。

淨土者。別指極樂及寂光也。都攝六根者。念屬意根。意根若淨。諸根自攝。故無選擇也。

音釋

糝

汝救切 雜也

縮

烏板切

緝

七入切

績

則力切

掣

尺列切

縈

於管切

切 呵

音詩 噍而食也

隘

烏介切

闌

故關切 市垣也

闡

胡對切 市之門也

抖

斗 擻

音叟

癰

音隆

漩

旬宣切 水回也

液

夷益切

稚

直利切

楞嚴經會解



大佛頂如來密因修證了義諸菩薩萬行首楞嚴經卷第五終

